

Tusagassiuutitut tapiissuteqartarneq pillugu Namminersorlutik Oqartussat nalunaarutaat nr. 19, 8. oktober 2015-imeersoq Atuussimasoq (Historisk)

Kulturikkut ingerlatsineq sunngiffimmilu sammisassaqaqtitsineq pillugit Inatsisartut peqqussutaanni nr. 10, 21. maj 2002-meersumi § 31 naapertorlugu aalajangersarneqarpoq:

Kapitali 1

Atuuffia

§ 1. Aningaasaliissutit aningaasanut inatsimmi aalajangersarneqartut iluanni Naalakkersuisut suliniutitut inuiaqatigiinnut paasissutissat allatat siammaannissaannik siunertaqartunut tapiissuteqartarput, tamatumani ilaatillugit demokratiskiusumik oqallinneq tusagassiuutitigullu tamatiguussuseq.

§ 2. Tapiissutit tunniunneqassapput suliniutip pilersinnissaanut inerisarnissaanulluunniit.

Imm. 2. Suliniutitut isigineqarpoq ingerlassaq piffissami killilikkami ingerlanneqartoq, aalajangersimasunik anguniagaqarfiusut inerineqartussanulluunniit.

Imm. 3. Suliniutit tusagassiorlutut nammineeurluni suliaasimasut siammaannissaannik siunertaqartut tapiiffigineqartassapput, tamatumunnga ilanngullugit misissueqqaarnerit.

Imm. 4. Tusagassiorfiit sumulluunniit attuumassuteqanngitsut pioreersut allatut ingerlatsilernissaat ineriartortinnissaalluunniit siunertarlugu suliniutit ineriartortinnissaannut tapiissuteqartoqartassaaq.

Imm. 5. Tapiissutit tusagassiuuteqarnermik ingerlatsisup suliffianut ingerlatsinermut tapit, nalinginnaasumik suliaqarnermut tapiissutitut tunniunneqarsinnaanngillat.

§ 3. Tusagassiuutitut arlaannaanulluunniit attuumassuteqanngitsunit, naqitanik imaluunniit allatanik internet-ikkoortitanik nutaarsiassaqaqtitsisunit ullutsinneersulerisunillu, suliniutitut aallartitanut ingerlanneqartunullu tapiisoqartassaaq, taakku imarisaat malinnaasunut kalaallinut naatsorsuunneqarlutik aaqqissugaappata, imaluunniit nunani allani pisunik Kalaallit Nunaannut naleqqusaaqarupata.

Imm. 2. Tusagassiuuteqarfiit arlaannaanulluunniit atanngitsutut isigineqassapput:

- 1) pisortanit, suliffeqarfinnit imaluunniit ingerlatseqatigiiffinnit pisortanit aningaasalersorneqartunit assigisaanilluunniit tamakkiisumik ilaannakortumilluunniit pigineqarunik imaluunniit
- 2) tusagassiuuteqarfiup minnerpaamik affaa sulisitsisut, sulisartut, suleqatigiit soqutigisaqatigiilluunniit kattuffiinit pigineqarpat, taakkununga ilanngullugit politikikkut partiit.

Imm. 3. Tusagassiuutitut naqitatut isigineqarput aviisit, atuagassiat saqqummersitaluunniit taakkununga assingusut.

Imm 4. Tusagassiuutitut allatatut internet-ikkoortitatut isigineqarput internetikkut tusagassiuutit allataanerusut. Assitaliinerit nipitaliinerillu annikinnerusumik ilaasinnaapput, allatamik erseqqissaataagunik.

Kapitali 2

Tapiissutisinissamut piumasaqaatit

§ 4. Suliniutinut, nalunaarutip atuuffiata iluaniittunut, suliniutip tapiiffigineqarsinnaatitaasup missingersuutaasa 70 %-iat angullugu tapiisoqarsinnaavoq, §§ 5-6-mi piumasaqaatit piviusunnigortinneqarsimappata.

§ 5. Tapiissutininik qinnuteqartoq tassaassaaq

- 1) tusagassiivik namminersortoq, tak. imm. 2,
- 2) piffissaq tapiiffigineqartoq tamaat akisussaasumik aaqqissuisoqartoq,
- 3) aaqqissueqataasunik sulisoqassaaq, akisussaalluni aaqqissuisoq peqatigalugu minnerpaamik ukiumut suliffiit pingasut amerlaqataannik, qinnuteqartup suliffik ukiumi qinnuteqarfiusumi imaluunniit ukioq qinnuteqarfik sioqqullugu ukiumi pilersissimangippagu,
- 4) namminerisamik tusagassiorlutut sulianik saqqummiisoq, annermik qulequttanik politikkimut, inuiaqatigiinnut kulturimullu tunngasunik imaqartunik, taakkualu minnerpaamik affaat tassaassallutik saqqummiussat aaqqissukkat, pilersaarutit ilaatinngit, qulequttat tamatigoortut iluanni allaaserisatut iluseqarlutik, soorlu nunami namminerimi pissutsinut, nunanut allanut, kulturimut najukkamilu pissutsinut tunngasuullutik, aamma nutaarsiassanik ullutsinneersunik sammisaqarlutik,
- 5) atuisunut siamasissumik saaffiginnittuussaaq, taamaallaallu inuussutissarsiorlutut imaluunniit assigiimmik sulialinnut, sulisitsisut, sulisut imaluunniit assigiinnik suliallit kattuffiinut, partiinut suliffeqarfinniluunniit assigiinnigitsuni sulisunut aalajangersimasunut saaffiginnittuussanani,
- 6) minnerpaamik qaammammut ataasiarluni saqqummertassaaq, imaluunniit ullut tamaasa nutarterneqartarluni – tamatumani internet-ikkut tusagassineq pineqarpat,
- 7) nuna tamakkerlugu atuisullu assigiimmik atugassaqartillugit saqqummiunneqassaaq, tamanillu takuneqarsinnaalluni,
- 8) annikinnerpaamik kalaallisut saqqummissaaq
- 9) Kalaallit Nunaanni angerlarsimaffeqassaaq.
- 10) tusagassiornermi suliniutip niuernermi pilersaarummi aningaasatigut imminut nappassinnaanera takutinneqassaaq aamma
- 11) tapiissuteqarnermi piumasaqaataasinnaasut eqqortinneqassapput.

Imm. 2. Tusagassiuut namminersortutut isigineqassaaq, tak. imm. 1, nr. 1, namminerisaminik aaqqissuisuuneqaruni. Tusagassiuutinit allatanit aammattaaq piumasaavoq, naqinneqarnerisa amerlassusaat immikkut nalunaarsorneqarsinnaassasut, aamma immikkut pisartagarineqarsinnaassasut.

§ 6. Suliniut tapiiffigineqarsimasoq, suli marloriarluni tapiiffigineqaqqissinnaavoq, suliniut naammassereersimangippat.

Imm. 2. Tusagassiuuteqarfik ukiumi ataatsimi suliniutinut ataatsimik amerlanerusunut tapiissutinik qinnuteqaruni, qinnuteqaatit pingaarnersiorlugit nassiutissavai.

Kapitali 3

Tapiissuteqartarnermut ataatsimiititaliaq

§ 7. Nalunaarut una naapertorlugu tusagassiuutinut tapiissutinik qinnuteqaatinik sularinnittartussamik tapiissuteqarnissamillu aalajangiisartussamik ukiumut ataasiarluni ataatsimiittartussamik tapiissuteqartarnermut ataatsimiititaliamik Naalakkersuisut pilersitsissapput.

Imm. 2. Ataatsimiititaliap suleriaasissaanik Naalakkersuisut aalajangersaassapput.

Imm. 3. Ataatsimiititaliap aalajangigai allaffissornermi oqartussanut allanut suliakkiissutigineqarsinnaanngillat.

Imm. 4. Kultureqarnermut Naalakkersuisoqarfimmit ataatsimiititaliamut allatseqarfik ingerlanneqassaaq.

§ 8. Ukuninnga innersuussereernikkut Naalakkersuisunit toqqarneqartartunik tapiissuteqartarnermut ataatsimiititaliaq pingasunik ilaasortaqaassaaq:

- 1) Ilisimatusarfik, ilaasortamik ataatsimik inuiaqatigiilerinermi ilisimasaqartumik innersuussisartoq,
- 2) Tusagassiorlut Kattuffiat, ilaasortamik ataatsimik tusagassiuutilerinermik ilisimasaqartumik innersuussisartoq,
- 3) Kalaallit Nunaanni inatsisilerituut kattuffiat, ilaasortamik ataatsimik ingerlatsinermi inatsisinik aningaasaqarnermillu ilisimasaqartumik innersuussisartoq.

Imm. 2. Ataatsimiititaliami ilaasortat 18-inik ukioqalereersimassapput aammalu Inatsisartunut, Folketingimut kommunalbestyrelsinullu ilaasortaassanatik qinigassanngortissimassannatilluunniit, piffissamiillu innersuunneqarfimmit ukiuni tallimani kingullerni Kalaallit Nunaanni tusagassiuutinut aningaasatigut atassuteqarsimassanatik. Ataatsimiititaliami ilaasortat tusagassiuutinut aningaasatigut taamatut atassuteqalersut ataatsimiititaliamit ingerlaannaq tunuassapput, tamassumalu kingorna imm. 1 naapertorlugu ilaasortamik nutaamik toqqaasoqassalluni.

Imm. 3. Ilaasortat piffissamut ukiunut marlunnut toqqarneqartassapput, tak. § 18. Ilaasortat toqqaqqinneqarsinnaapput.

Imm. 4. Tapiissuteqartarnermi ataatsimiititaliami ilaasortat Inatsisartunut Naalakkersuisunut il.il. ilaasortat akissarsiaat il.il. pillugit Inatsisartut inatsisaanni kapitali 7-imi malittarisassat malillugit akissarsiaqassapput, ullormusiaqassalutik angalanermilu aningaasartuutinik akiliunneqartassallutik.

Kapitali 4

§ 9. Tapiissutininik qinnuteqaat tapiissuteqartarnermut ataatsimiititaliap allatseqarfianut tunniunneqareersimassaaq, tak. § 7, imm. 4, 1. maj – ullorsiutit malillugit ukiumi suliniutip aallartiffiani, taamaattoq tak. § 17.

Imm. 2. Suliniutit tapiissutininik qinnuteqaatigisat tamarmik immikkut qinnuteqaasiunneqassapput.

Imm. 3. Qinnuteqaammut ilanngunneqassapput:

- 1) suliniutip allaasereqqissaarnera,
- 2) aningaasartuutissatut isertitassatullu missingersuutit aamma aningaasalersuinissamut pilersaarut aamma
- 3) tusagassiuutip qinnuteqartup ullorsiutit malillugit ukiumi siuliani naatsorsuutai, tusagassiuut ukiumi qinnuteqarfiusumi pilersinneqarsimangippat.

Kapitali 5

Naatsorsuutit kukkunersiuinerlu

§ 10. Suliniutip naammassineraniit kingusinnerpaamik qaammatit pingasut qaangiunneranni tapiiffigineqartut, tapiissutit atonerisa naatsorsuutaat atsiukkat Kultureqarnermut Naalackersuisoqarfimmut nassiutissavaat.

Imm. 2

. Naatsorsuutit kukkunersiuusumit naalagaaffimmit akuerisaasumit imaluunniit kukkunersiuusutut nalunaarsukkamit kukkunersiorneqarsimassapput, kr. 150.000-inik qaangerlugilluunniit tapiissutisiarineqarsimappata.

§ 11. Kukkunersiuineq kukkunersiuinermi ileqqorissaarneq naapertorlugu ingerlanneqassaaq.

Imm. 2. Kukkunersiuinermi ilaatigut makku misissorneqassapput:

- 1) Tapiissutit siunertamut atorneqarsimanerat.
- 2) Tapiinermi piumasaqaatit piviusunnngortinneqarsimanersut.
- 3) Suliniummut naatsorsuutit eqqortuunersut, pingaarutilinnik kukkuneqaratik amigaateqaratillu.
- 4) Tapiiffigineqartoq aningaasaqarnikkut naammaginartumik mianerinnissimanersoq, taamaalillunilu suliniutip piviusunnngortinnissaa pisariaqanngitsunik aningaasartuutaanani.
- 5) Paasissutissat, tapiiffigineqartup Kultureqarnermut Naalackersuisoqarfimmut nalunaarutigisai, uppernarsaatissaqarnersut.

Imm. 3. Kultureqarnermut Naalackersuisoqarfik naatsorsuutininik ataasiakkaanik nakkutilliilluni misissuisassaaq.

§ 12. Tapiissutit kr. 150.000 ataappatigit kukkunersuisoqassanngilaq.

Imm. 2. Tapiissutisisup naatsorsuutit atsiornersigut uppersassavaa, naatsorsuutit eqqortuusut tapiissutillu siunertamut atorqarsimasut.

Imm. 3. Kr. 150.000 ataallugit tapiissutisisoq tapiisartunit allamit allanilluunniit tapiiffigineqarsimaguni, tapiissutisisoq tamanna pillugu Kultureqarnermut Naalackersuisoqarfimmut uppersaatiniq nassitsissaaq.

Imm. 4. Kultureqarnermut Naalackersuisoqarfiup tapiissutisisoq peqqusinnaavaa, suliniutip naammassinerani immersugassat nalunaarfissat Naalackersuisoqarfimmit suliarineqarsimasut immersoriarlugit nassiteqqullugit.

Kapitali 6

Allaffissornikkut aqutsineq, nakkutilliineq pineqaatissiissutillu

§ 13. Tapiissuteqartarnermik aaqquissuussinermik allaffissornikkut aqutsineq Kultureqarnermut Naalackersuisoqarfimmit tapiissuteqartarnermut ataatsimiititaliamut allatseqarfittut ingerlanneqassaaq.

Imm. 2. Paasissutissat tapiissuteqarnermut tunngaviusut annertuunik allannguuteqarpata tapiissutisisoq Kultureqarnermut Naalackersuisoqarfimmut ingerlaannaq nalunaaruteqarnissamut pisussaaffeqarpoq.

§ 14. Tapiissuteqartarnermut ataatsimiititaliap tapiissutisisut tapiissutiniq atuinerat aamma nalunaarut manna naapertorlugu tapiissutit pillugit malittarisassanik tapiissutisinissamullu piunasaqaataajunnartunik maleruaanerat nakkutigissavaa.

Imm. 2. Tapiissuteqartarnermut ataatsimiititaliap tapiissutisisoq, paasissutissanik suliniummot tapiiffigineqartumut naleqqiullugu nakkutilliinissamut pisariaqartunik, qaqugukkulluunniit piniarfigisinnaavaa.

§ 15. Tapiissuteqartarnermut ataatsimiititaliap tapiissutiniq tunniussineq unitsissinnaavaa, tapiissutisinissamut tunngaviit atorunnaartutut nalilerneqarpata.

Imm. 2. Tapiissuteqartarnermut ataatsimiititaliap tapiissutit tunniunneqartut tamakkiisumik ilaannakortumilluunniit uterteqqusinnaavai, ima pisoqartillugu:

- 1) Tapiissutisisup tapiissutisinissamut piunasaqaatit eqquutsikkunnaarpagit, tamatumunnga ilanngullugu ingerlanniakkattut naatsorsuutigisat ingerlanneqannginnerat.
- 2) Tapiissutisisup tapiinissamut piunasaqaataajunnartut maleruanngippagit.
- 3) Tapiissutisisoq kukkusunik eqqunngitsunilluunniit paasissutissiisimappat imaluunniit qinnuteqarnermini uppersaasiinermilunniit paasissutissat pingaarutillit nipangiutiinnarsimappagit.
- 4) Tapiissutisisup paasissutissat naapertuuttut nassiuukkumanngippagit, tamatumunnga ilanngullugit naatsorsuutit naliliinermilu immersugassaaq.
- 5) Tapiissutisisup aningaasat tapiissutiniq qinnuteqarnermini missingersersuutaasunik ikinnerusut atorsimappagit.

Kapitali 7

Atuutilersitsinermut ikaarsaariarnermullu aalajangersakkat

§ 16. Nalunaarut manna tamanut ilisimatitsissutigineqarnermini atuutilissaaq.

§ 17. Ullorsiutit malillugit ukiumi 2015-imi suliniutinut tapiissutinik qinnuteqaatit
Kultureqarnermut Naalakkersuisoqarfimmeeriissapput kingusinnerpaamik 1. november 2015.

§ 18. Tapiissuteqartarnermut ataatsimiititaliaq piffissamut 15. oktober 2015-imiit 30. september
2017-imut siullermeerluni toqqarneqassaaq.

Namminersorlutik Oqartussat 8. oktober 2015

Nivi Olsen

/

Mikael Kristensen